

四庫全書

經部

欽定四庫全書

毛詩類釋卷十五

國子監祭酒顧棟高撰

釋木

榛

陸氏璣曰榛栗屬有兩種其一種皮葉皆如栗子小形如杼子味亦如栗所謂樹之榛栗者也其一種葉如木蓼生高丈餘作胡桃味山有榛之榛是也遼東上

黨皆饒有之子似椽子枝莖可以為燭

范氏祖禹曰榛栗為女贄

蔡氏卞曰榛小木也以為禮實則貴矣植之榛栗先禮實也蓋衛居處於漕無城市宮室君臣上下冠婚喪祭無以為禮實則於是不可不先也

栗

陸氏璣曰五方皆有栗惟漁陽范陽栗甜美味長他方悉不及也倭韓國諸島上栗大如雞子亦短味不美

桂陽有莘栗叢生大如杼子形色與栗無異但差小耳又有奧栗子圓而細或云即莘今惟江湖間有之又有茅栗佳要其實更小而木栗不殊但春生夏花秋實冬枯為異耳

周禮饋食之籩其實栗

# 梅

陸氏璣曰梅杏類樹及葉皆如杏而黑耳曝乾為腊置羹臠壺中又可含以香口

朱子詩傳梅木名華白實似杏而酢

桃

朱子詩傳桃木名華紅實可食夭夭少好貌灼灼華之盛也木少則華盛

孔疏桃或少而未華或華而不少此詩夭夭灼灼並言之則是少而有華者以喻女少而色盛言及時也徐氏常吉曰桃之為木多華然五年則老老則華減故以木少華盛為言

蔡氏卞曰桃先百果而花故從兆其時則春而陽中也故以紀昏姻之時正朱氏道行曰凡華艷者鮮實桃夫不然春開夏結其實多而味美故曰有實其實于歸者之有子似之

李

爾雅休無實李

郭註一名趙李邢疏李之無實者名休

接慮李

郭註今之李李邢疏

與參同熟因名

駁赤李

邢疏李之子赤者名駁

李時珍曰李綠葉白花其種近百色味不同遲早亦

異麥李四月熟又有十月十一月熟者又有季春李  
冬花春實者東都嘉慶坊有美李人呼為嘉慶子中  
紅意爾雅所謂駁赤李者即此是也王風咏丘中有  
李繼麻麥之後謂賢者自有丘園之樂無意仕進故  
國人望其來而思之朱子解非是

鬱

劉稹毛詩義問云鬱五六尺其實大如李正赤食之甜  
本草云鬱一名崔李一名車下李一名棣生高山川

谷或平田中五月時實

萸

毛傳萸萸萸也孔疏萸亦是鬱類而小別晉宮閣銘云  
華林園中有車下李三百一十四株萸李一株車下  
李即鬱萸李即萸二者相類而同時熟又云鬱萸生  
可食故以食言之葵菽須烹煮乃食棗當就樹剝擊  
取之故立丈小異其實皆是食也

嚴氏詩緝疏云鬱是車下李萸是萸李則萸李非車



下李矣陸璣既以唐棣為萸李又云萸李一名車下李蓋由二者相類故稱名相亂

唐棣

爾雅唐棣移郭璞註似白楊江東呼夫移舍人曰詩召南云唐棣之華陸璣疏唐棣萸李也一名雀梅其花或白或赤六月中熟大如李子可食

詩緝唐棣即七月之萸也

陸氏佃曰其華先反而後合詩曰偏其反而凡木之

華先合而後開唯此華先開而後合秦晨風云隰有  
苞棣

常棣

爾雅常棣棣郭璞註今關西有棣樹子如櫻桃可食舍  
人曰詩小雅云常棣之華陸璣疏云白棣樹也如李  
而小如櫻桃正白今官園種之又有赤棣樹亦似白  
棣葉如刺榆葉而微圓子正赤如郁李而小五月始  
熟孔疏曰與唐棣異木故爾雅別釋

臣謹案召南之唐棣即莫大如李小雅之常棣小

如櫻桃埤雅亦云唐棣之華反而後合此非常道  
故詩以譬權則此華之上承下覆甚相親適者常  
而已矣故曰常棣也明係二物今人多混并坊間  
誤刻常棣為棠棣今正

棣  
棘

爾雅壺棣

郭註棣大而銳上者為壺壺猶瓠也

邊要棣

郭註細腰今謂之鹿盧棣

檠

白棣

子白乃熟

檠酸棣

樹小實酢孟子曰養其檠棘案此即今之酸棣卽風吹彼棘心魏風

國有棘即此是也

遵羊棗

實小而圓紫黑俗呼之為羊矢棗孟子曰曾皙嗜羊棗

洗大

棗

出河東猗氏縣大如雞卵

蹶洩苦棗

子味苦

皙無實棗

不著子者

還味

稔棗

還味短味

右爾雅別棗類凡九種櫟即所謂棘陸佃埤雅云大曰棗小曰棘棘酸棗也棗性高故重束棘性低故並束束音次棗棘皆有刺鍼

嵩陽子曰余家於滑臺酸棗縣即滑之屬邑其樹高數丈徑圍一二尺棗圓小而味酸今市人賣者皆棘子

也寇宗奭曰小則為棘大則為酸棗更非二物

詩緝曰經有二棘吹彼棘心園有棘酸棗也楚茨以棘配茨青蠅以棘為樊舊不知為何物今按爾雅釋草云策刺郭璞云草刺鍼也方言凡草木刺入北燕朝鮮之間謂之策自關而西謂之刺江湘之間謂之棘則此棘屬草部非木部判然二物矣

檉

爾雅檉蘿郭註今楊檉也實似梨而小酢可食邢疏詩

秦風云隰有樹檉陸璣疏云檉一名赤蘿一名山黎  
實如黎但小耳一名鹿黎一名鼠黎今人亦種之極  
有脆美者

陸氏佃曰其文細密如羅故曰羅赤羅文棘白羅文  
緩雖皆文木赤白為異

甘棠 杜

爾雅杜赤棠白甘棠郭璞曰甘棠今之杜梨邢疏樊光  
云赤者為杜白者為棠陸璣云赤棠與白棠同但子

有赤白美惡異耳白色為白棠甘棠也少酢滑美亦棠子澀而酢無味俗語云澀如杜是也

臣謹案詩曰蔽芾甘棠曹氏曰蔽芾陰翳茂盛也

詩言杜者凡三俱言有杕之杜杕特生也與蔽芾相反意赤棠與白棠其性本異赤棠木理韌亦可作弓幹今謂之棠梨用以鋟雕文字亦以其堅韌故耳

樞

爾雅蘊莖郭註今之刺榆邢疏詩唐風云山有樞陸璣

疏其針刺如柘其葉如榆淪為茹美滑

莖大結反

鄭樵曰有一種刺榆有鍼刺如柘其葉如榆淪為茹則滑美勝於白榆爾雅云樞莖唐風云山有樞即刺榆也

木瓜

爾雅楸

音茂

木瓜郭註實如小瓜酢可食邢疏詩衛風投

我以木瓜是也



己上花果之木

梧桐

爾雅櫟桐郭註今梧桐又謂之榮桐木以其華而不實故名邢疏櫟一名梧詩大雅云梧桐生矣于彼朝陽是也陸璣曰白桐材中琴瑟今雲南牂牁人績其皮為布甚好詩緝曰桐有青桐有白桐梧桐生矣之桐為青桐椅桐梓漆之桐為白桐

椅梓

爾雅椅梓郭註即楸邢疏詩廊風云椅桐梓漆陸璣疏  
楸之疏理白色而生子者為梓梓實桐皮曰椅大類  
桐而小別也

陸氏佃曰今呼牡丹為花王梓為木王蓋木莫良於  
梓故書以梓材名篇禮以梓人名匠蕭炳云梓樹如  
桐而葉小花紫

鄭樵曰梓與楸相似爾雅以為一物誤矣人家多種  
於園亭令子孫孝順

漆

許氏慎曰漆木汁可以髹

音休

物象形漆如水滴而下

蘇氏頌曰漆木高二三丈皮白葉似椿花似槐子若  
牛李六七月以竹筒針入木中取之

檉

爾雅檉河柳郭註今河旁赤莖小楊邢疏陸璣云生水  
旁皮正赤一名雨師枝葉如松

鄭樵曰檉本草謂之赤檉木以其材赤故也大概杉

松之類而意態似柳故謂之桲柳爾雅其材可卷為盤合又曰穫落郭云可以為桲器素

臣謹案據此則桲與大東無浸穫薪之穫同一物姑存之

梲

爾雅梲櫜郭註腫節可以為杖邢疏大雅皇矣云其梲其梲陸璣疏節中腫似扶老今人以為馬鞭及杖

灌

毛傳灌叢生也爾雅灌木叢木邢疏詩周南云黃鳥  
于飛集于灌木是也

栂

爾雅栂栂

音而

郭註栂樹似榲桲而庫小子如細栗可食

今江東亦呼為栂栗邢疏大雅皇矣云其灌其栂陸  
璣云葉如榆木理堅韌而赤可為車轅

櫨 翳

爾雅立死不斃頓者名櫨枝葉蔽陰覆地者名翳邢疏

大雅皇矣曰其菑其翳毛傳木立死曰菑自斃為翳  
以立死之木妨他木生長為木之害故曰菑自斃者  
生木自倒枝葉覆地為蔭翳故曰翳其文與此不同  
者所見本異也

檠 柘

爾雅檠山桑郭註檠桑柘屬材中作弓及車轅大雅皇  
矣云其檠其柘冬官考工記云弓人取幹柘為上檠  
桑次之是也 寇宗奭曰柘木裏有文亦可旋為器

李時珍曰處處山中有之喜叢生幹疎而直葉厚而  
豐團而有光其葉飼蠶取絲作琴瑟清響勝常爾雅  
所謂棘繭即此蠶也其實狀如桑子粒如椒其木染  
黃赤色謂之柘黃天子所服

柎

爾雅柎櫪郭註似棗細葉葉新生可飼牛材中車輞邢  
疏詩唐風云隰有柎陸璣疏云葉似杏而尖白色皮  
正赤為木多曲少直枝葉茂好二月中葉疎華如練

而細藥正白今官園種之正名曰萬歲

梅

爾雅梅柟郭註似杏實酢邢疏荊州曰梅揚州曰柟秦  
風終南云有條有梅陸璣云梅樹皮葉似豫樟葉大  
如牛耳一頭尖赤心華赤黃子青不可食柟葉大可  
三四葉一叢木理細緻于豫樟子赤者材堅子白者  
材脆是也

楸



爾雅楸鼠梓郭註楸屬也今江東有虎梓邢疏詩小雅云北山有楸陸璣云其樹葉木理如楸山楸之異者鄭樵曰即烏巢子也

楸

爾雅楸赤棟白者棟

棟音棘

郭註赤棟樹葉細而岐銳皮理

錯戾好叢生山中可為車輜白棟葉圓而岐為大木邢疏詩小雅云隰有杞楸陸璣疏棘葉如柞皮薄而白其木理赤者為赤棟一名楸白者為棟其木皆堅

韜今人以為車轂

粉

爾雅榆白粉郭註粉榆先生葉却著莢皮色白邢疏榆之皮色白者名粉陳風東門之粉是也

柞械

爾雅械白桺郭註桺小木叢生有刺實如璫邢疏大雅云柞械拔矣陸璣疏云三蒼說械即柞也其材理全白無赤心者為白桺直理易破可為犢車輻又可為

矛戟矜

鄭箋柞櫟也陸璣疏周秦人謂柞為櫟

櫟

爾雅櫟其實捄郭註有捄彙自襄邢疏櫟似櫟之木捄  
盛實之房也秦風山有苞櫟陸璣疏秦人謂柞櫟為  
櫟此秦詩宜從方言

鄭樵曰南土多櫟北土多櫟爾雅櫟其實捄秦風山  
有苞櫟並此也其釋木云栩杼與唐風集于苞栩並

是柞木而陸璣誤謂是此耳

棫櫟 苞櫟

爾雅櫟枹者郭註櫟屬叢生者為枹詩所謂棫櫟苞櫟  
邢疏枹櫟皆木叢生之名櫟屬叢生者為枹大雅云  
芄芃棫櫟薪之櫟之是也枹櫟者秦風云山有苞櫟  
隰有六駁是也

臣謹案詩言柞棫又言櫟又言棫櫟又言苞櫟陸  
璣謂棫即柞柞即櫟看來只是一物臣以大雅言

柞械者三縣皇矣二詩俱與下松栢相對松栢係二物則柞械亦言二物可知但相類耳械而言樸欒而言苞更舉其形狀言之苞言其叢生樸屬言其根株盤結依附迫迤而生皆不才之木止可供薪樵耳

龐元英文昌雜錄今關中有白蕤械樸也芄芄叢生民家多採作薪且言烟與他木異嘗取試之其烟上直如線高五七丈不絕詩所謂薪之樵之物雖微可以升燎於上帝亦蘋蘩蕓藻之謂邪

樗

鄭箋樗惡木陸璣疏采茶薪樗之樗樹及皮皆似漆青色耳其葉臭止可為薪小雅蔽芾其樗之樗此山樗也與田樗畧無異葉似差狹耳吳人以其葉為茗

椒

爾雅檿大椒郭註今椒樹叢生實大者名為檿邢疏唐風云椒聊之實陸璣疏椒樹如茱萸有針刺葉堅而滑澤蜀人作茶吳人作茗皆合煮其葉以為香可著

飲食中又用蒸雞豚最佳

檀 六駁

詩坎坎伐檀又小雅檀車憚憚陸璣草木疏檀木皮正  
青滑澤色似駁馬駁馬梓榆其樹皮青白駁瑩遙視  
似馬故謂之駁馬亦曰六駁詩秦風云山有苞櫟隰  
有六駁或以六駁為獸觀下章云山有苞棣隰有樹  
櫟皆山澤木相配不宜謂獸

女桑

爾雅女桑楸桑郭註今俗呼桑樹小而條長者為女桑  
樹邢疏豳風七月云猗彼女桑是也

穫薪

爾雅穫

鎡音

落郭註可以為杯器素邢疏穫一名落可作

杯椹皮韌繞物不解小雅大東云無浸穫薪鄭箋曰  
穫落木名陸璣疏今榔榆也其葉如榆其皮堅韌剝  
之長數尺可為絙索又可為甌帶其材可為杯器是  
也



臣謹案小雅無浸穫薪之穫字從禾毛傳曰穫刈也正義謂讀如穫稻之穫是穫為虛字乃是穫稻之薪耳而爾雅穫落之穫從木是木名音穫一名落字既不同音義亦異康成殊屬強解故朱傳及嚴氏詩緝俱從毛

松栢

爾雅栢栢邢疏栢一名栢陸佃曰雜記所謂暢白以栢者是也栢性堅緻有脂而香故古人破為暢白用以

擣鬱詩曰汎彼柏舟在彼中河言柏非不可以為舟  
特非柏之所宜故共姜守義引以自況王安石字說  
云松柏為百木之長松猶公也柏猶伯也故松從公  
柏從白六書精蘊曰萬木皆向陽而柏獨西指蓋陰  
木而有貞德者故字從白白者西方也

檜

爾雅檜柏葉松身郭註詩檜楫松舟王安石曰柏視松  
猶伯視公伯用詘所執躬主者以此公用直所執桓

主者以此檜相葉松身則葉與身俱曲樅松葉柏身則葉與身皆直樅以直而從之檜以曲而會之世云柏之指西猶鍼之指南也

臣謹案古人作室造舟惟用松柏及楊商頌松柏丸丸魯頌徂來之松新甫之柏邶風柏舟衛風檜楫松舟小雅又云汎汎楊舟罕有用杉者杉爾雅作貼與杉同音郭註貼似松生江南可以為船及棺材作柱理之不朽蓋三代俱建都北土不生此木

又地氣高燥松柏俱植高岡上性堅耐久今人用作  
樑柱多患蟲蛀中空則古今地土不同故也

### 楊

爾雅楊蒲柳郭註可以為箭左傳所謂董澤之蒲是也  
埤雅云楊有黃白青赤四種惟黃楊貴堅緻難長俗  
語黃楊厄閏楊之享甲早於衆木昏姻失時則曾木  
之不如也故詩曰東門之楊其葉牂牁牂牁盛也東  
門之楊其葉肺肺肺衰也以言嫁娶之暮如此

鄭樵楊之類多白楊多種於墟墓間所謂白楊多悲風蕭蕭愁殺人是水楊曰楊柳詩云楊柳依依是也又云蒲柳可為箭幹左傳董澤之蒲是也

柳

埤雅柳柔脆易生之木與楊同類雖縱橫顛倒植之皆生松柏醜茂桑柳醜菀詩曰菀彼柳斯又曰有菀者柳不尚息焉言柳之菀非若松柏之茂然人尚庶幾息焉以言幽王之不可朝事曾菀柳之不如也

樸椒

爾雅樸心邪疏樸椒一名心某氏曰樸椒有心能耐

音

濕江河間以作柱是樸椒為本名也詩召南云林有樸椒此云椒樸是傳寫之誤

苞栩

爾雅栩杼郭註柞樹邪疏栩一名杼唐風云集于苞栩陸璣疏今柞櫟也徐州人謂櫟為杼或謂之為栩其子為皐斗煮其殼為汁可以染皐

穀

陸璣疏幽州人謂穀桑中州人謂之楮殷中宗時桑穀並生是也今江南人績其皮以為布又擣以為紙謂之穀皮紙長數丈潔白光輝其葉初生可以為茹

陸佃埤雅穀惡木也而謂之穀猶甘草謂大苦之類小雅樂彼之園爰有樹檀其下維籜又曰其下維穀蓋檀堅厚籜脆薄其別之易也穀則惡木而疑於美散木而疑於才其別之則難矣故一章言尚其樹檀

而下其籜二章言尚其樹檀而下其穀以誨宣王分  
別善惡有隆於後

栲

爾雅栲山樗郭註似樗色小白生山中因名亦類漆樹  
邢疏唐風云山有栲陸璣謂山樗與下田樗畧無異  
葉似差狹耳吳人以其葉為茗方俗無名此為栲者  
葉如櫟木皮厚數寸可為車輻或謂之栲櫟詩緝曰  
姑兩存之



栲

陸璣疏栲其形似荆而赤莖似著土黨人織以為斗筲箱器又揉以為釵大雅旱麓云榛栲濟濟即此栲也

枸

陸璣疏枸樹山木其狀如櫨一名枸骨高大如白楊所  
在山中皆有理白可為函板枝柯不直子着枝端大  
如指長數寸甘美如飴八九月熟江南特美今官園  
種之謂之木蜜古語云枳枸來巢言其味甘故飛鳥

慕而巢之本從南方來能令酒味薄若以為屋柱則一屋之酒皆薄按小雅南山有枸即此是也

蒲

陸璣疏蒲柳有兩種皮正青者曰小楊其一種皮紅正白者曰大楊其葉皆長廣似柳葉皆可以為箭幹故春秋傳曰董澤之蒲可勝既乎今人又以為箕籬之楊按王風揚之水不流束蒲即此是也

條

爾雅槲

音

山榎

音

郭註今之山楸邢疏秦風云終南何

有有條有梅陸璣疏條槲也今山楸也皮葉白色亦

白材理好宜為車板能濕又可為棺木

苦茶

爾雅檟苦茶郭註樹小如梔子冬生葉可煮為羹飲今

呼早采者為茶晚取者為茗一名薺

音

蜀人謂之苦

茶陸羽茶經云其名有五一日茶二曰檟三曰設

音

四曰茗五曰薺楊慎丹鉛錄云茶即古茶字音途詩

云誰謂荼苦其甘如薺是也顏師古云漢時茶陵始轉途為宅加切或言六經無茶字未深考耳魏了翁邛州先茶記曰茶之始其字為荼如春秋書齊荼漢志書茶陵之類陸顏諸人雖已轉入茶音未嘗輒改字若爾雅若本草猶從草從余徐鼎臣訓茶猶曰即今之茶也惟陸羽盧仝以後則遂以茶為茶矣

顧炎武曰古時未分麻韻茶苻字亦只讀為徒漢魏以下乃音宅加反而加字音居何反則猶在歌戈韻

梁以下始有今音又妄減一畫為茶字愚游泰山岱  
嶽遍覽唐碑題名見大厯十四年刻茶藥字貞元十  
四年刻茶宴字皆作茶又李邕娑羅樹碑徐浩不空  
和尚碑吳通微楚金禪師碑茶毗字崔琪靈運禪師  
碑茶椀字亦作茶其時字體尚未變至會昌元年柳  
公權書玄秘塔碑銘大中九年裴休書圭峰禪師碑  
茶毗字俱減此一畫則此字變於中唐以下也 漢  
書王子侯表茶陵節侯訢師古曰茶音塗地理志茶

陵則曰荼音丈加反一人注書前後不同如此今湖  
廣長沙府茶陵州字竟作茶不復知有塗音矣路史  
引衡圖經曰茶陵者山谷中生茶茗也茶茗之茶本  
應作茶唐權德輿陸宣公翰苑集序領新茶一串而  
已作此字今茶字乃俗字也

臣謹案爾雅釋草云荼苦菜郭註詩曰誰謂荼苦  
苦菜可食邢昺疏本草云一名茶生於寒秋經冬  
歷春乃成月令孟夏苦菜秀是也於釋木又云櫟

苦茶陸羽及顏師古俱謂茶即古之荼字而魏了

翁及近世顧炎武復申其辨甚力然則今日之茶

爾雅於草木蓋兩收之未知其究屬何部也

茶之為字

上從草下從木則  
兼收理當有之

至陸璣草木疏則專收入草部

而云得霜甜脆而美詩所謂堇荼如飴內則云濡

豚包苦

音而謂亨之  
以汁和也

用苦菜是也又似與茶少別

茶味苦與豚殊不相宜陸佃埤雅又引陳風出其

閨闈有女如荼則竟以英荼之荼混入又堇荼如

飴引驪姬置葷於肉以為證則是大毒殺人之物  
詩人何所取以為周原之美乎其說雜亂不倫得  
嚴氏祭辨之較然明矣詳見前釋草中

桑

爾雅有女桑楸桑壓桑山桑郭註俗呼桑之小而條長  
者為女桑其山桑似桑材中弓弩壓桑絲中琴瑟皆  
材之美者桑實曰葇毛傳鳩食葇過多則醉而傷其  
性



樛木

爾雅下句曰枵

音求與  
樛同

郭註樹枝下垂而曲名枵詩周

南南有樛木是也

喬木

爾雅上句曰喬郭註樹枝上竦而曲卷者名喬周南南有喬木鄭風山有喬松是也

瘰木

瘰同  
壞

爾雅瘰木苻婁郭註謂木病尫偻癭腫無枝條升疏小

弁云譬彼痍木疾用無枝謂木病尪偃內疾故無枝  
條詩作壞木毛傳壞痍也孔疏太子以見放之故棄  
其妃匹不得俱去譬彼內病之木不生枝條猶太子  
無匹不得生子也

毛詩類釋卷十五

欽定四庫全書

毛詩類釋卷十六

國子監祭酒顧棟高撰

釋鳥

鳳凰

爾雅鷗鳳其雌凰郭註瑞應鳥雞頭蛇頸燕頤龜背魚  
尾五彩色高六尺許許慎說文云神鳥也出於東方  
君子之國翱翔四海之內過崑崙飲砥柱濯羽弱水

暮宿丹穴見則天下大安寧鳳飛則羣鳥從以萬數  
鄭樵曰其雛曰鸞鸞晨鳴曰發鳴朝鳴曰上翔晝鳴  
曰滿昌昏鳴曰固常夜鳴曰保長

脊令

爾雅鵲令雛渠郭註雀屬也飛則鳴行則搖邢疏鵲令  
一名雛渠水鳥小雅云脊令在原陸璣疏大如燕雀  
長脚長尾尖喙背上青灰色腹下白頸下黑如連錢  
陸佃曰俗呼雪姑其色蒼白如雪

程子曰言脊令首尾相應兄弟急難之時其相應如是也

鷺 白鳥

爾雅鷺春鉏郭註白鷺也頭翅背上皆有長翰毛邢疏鷺一名春鉏陳風云值其鷺羽陸璣疏鷺水鳥也好而潔白故謂之白鷺青脚高尺七八寸尾如鷹尾喙長三寸頭上有長毛十數枚毵毵然與衆毛異好入水取魚楚威王時有朱鷺合沓飛翔而來舞樂府有

朱鷺曲但赤者絕少

埤雅鷺白鳥也大雅麀鹿濯濯白鳥翯翯即此

黃鳥 倉庚

爾雅皇黃鳥郭註俗呼黃離留亦名搏黍邢疏皇名黃  
鳥周南云黃鳥於飛陸璣疏黃鳥黃鸝留也常以堪  
熟時來故里語曰黃栗留看我麥黃堪熟否故又名  
黃栗留一名倉庚七月詩倉庚于飛熠燿其羽蓋正  
當仲春嫁娶之時爾雅又名鷦黃又名楚雀蓋一物

而有六名

燕 玄鳥

爾雅燕燕

音

郭註詩云燕燕于飛一名玄鳥齊人呼

鳬邢疏燕燕即今之燕古人重言之漢書童謠云燕

燕尾涎涎是也其色黑故又名玄鳥商頌天命玄鳥

降而生商本紀簡狄吞燕卵而生契而諸緯候皆言

吞鳬卵是玄鳥又名鳬也

鄭樵曰陸璣云燕有二種爾雅又曰燕白脰鳥則知



此爲紫燕矣

鴛鴦

毛傳鴛鴦匹鳥陸氏佃曰鳬類雄雌未嘗相離人得其  
一則一思而死故先王慎於取之鴛鴦之詩一章曰  
鴛鴦于飛畢之羅之言于其飛然後畢之羅之也則  
不毀卵不射宿故也二章曰鴛鴦在梁戢其左翼言  
以我交於萬物有道故彼于止得其所止也

睢鳩

爾雅睢鳩王睢

七徐反

郭註鵬類今江東呼之為鶚好在

江渚食魚毛詩傳曰鳥摯而有別邢疏王睢一名睢  
鳩周南云關關睢鳩陸璣疏睢鳩大小如鴝深目目  
上骨露幽州謂之鷩鷩而有別此即關雎傳文鷩至  
也謂鳥中雌雄情意至厚而猶能有別故以興后妃  
毛傳睢鳩鶚也即郊子所謂睢鳩司馬氏也杜預注  
摯而有別故為司馬法制

陸佃曰語云睢鳩不再匹徐鉉草木蟲魚圖書云睢

鳩常在河洲之上為儔偶更不移處蓋鷦性好峙每立更不移處所謂鷦立義取諸此俗云睢鳩交則雙翔別則立而異處是謂鷽而有別

蘇氏曰鳥之鷽者不淫歐陽氏曰此詩不取其鷽取其別也

鄭樵曰凡鴈鷽之類其喙扁者則其聲關關鷽雉之類其喙銳者則其聲鷽鷽此天籟也睢鳩之喙似鳬鴈故其聲如是又得水邊之趣也使不識睢鳩則安

知河洲之趣與關關之聲乎

鵲鳩

爾雅鵲鳩鵲鳩

音吉

郭註今之布穀也邢疏曹風鵲鳩

在桑其子七兮召南維鵲有巢維鳩居之皆謂此埤

蒼云鵲鳩方言曰戴勝陸璣疏按梁宋之間謂布穀

為鵲鳩戴勝自生穴中不巢生而方言云戴勝非也

歐陽氏曰今所謂布穀戴勝者與鳩絕異今人直謂

之鳩者拙鳥也不能作巢多在屋瓦間或於木上架

結木枝初不成窠便以生子往往墜雛鵲作巢甚堅  
既生雛散飛則棄而去容有鳩來處彼空巢

孔詩疏鴈鳩之養七子旦從上而下莫從下而上平  
均如一

詩緝曰即郊子所謂鴈鳩氏司空也鴈鳩平均故為  
司空平水土

鳴鳩

爾雅鴈鳩鴈鳩

音骨朔鴈  
居物切

郭註似山鵲而小短尾青黑

色多聲今江東亦呼為鶻鶻邢疏即郊子所謂鶻鶻  
氏司事也春來秋去故為司事小雅宛彼鳴鳩翰飛  
戾天月令鳴鳩拂其羽即此

詩緝曰鳴鳩即氓詩食葢之鳩郊子所謂鶻鶻氏司  
事莊子所謂鶻鶻也舊說及廣雅皆云斑鳩非是

陸氏佃曰莊子所謂鶻鶻笑之者是也多聲故名鳴  
鳩鳴鳩小物決起而飛搶榆枋時則不至控於地而  
已矣今飛戾天勉強故也性食桑葢陸璣云一名斑

鳩似鵲鳩而大項有繡文斑然與此鵲鳩全異璣之言非是此鳥喜朝鳴故曰鵲朝也此鳥朝鳴曰朝夜鳴曰咬

鵲音追

爾雅佳其鵲鳩

音夫

郭註今鵲鳩邢疏鵲一名夫鵲郊

子所謂祝鳩氏司徒也小雅曰翩翩者鵲毛傳云鵲夫不也一宿之鳥鄭箋一宿者一意於所宿之木鳥之謹慤者人皆愛之此是謹慤孝順之鳥左傳注曰

祝鳥孝故主教民

詩緝曰雛鵪鳥也一鳥而十四名雛也佳其也鵪鵪也祝鵪也鵪鵪也鵪鵪也鵪鵪也楚鵪也鵪鵪也荆鵪也乳鵪也鵪鵪也鵪鵪也鵪鵪也鵪鵪也鵪鵪音孚浮亦作夫不

陸氏佃曰雀聲慘毒鳩聲慈孝鴈鳩性壹而慈祝鳩性壹而孝離鳥之短尾總名也

鷹



爾雅鷹鵠郭註鵠當為鵠字之誤左傳作鵠鵠是也  
邢疏郊子曰鵠鵠氏司寇也杜注鵠鵠鷹也鷙故為  
司寇主盜賊大雅維師尚父時維鷹揚埤雅曰言其  
武之奮揚如此樂記所謂發揚蹈厲太公之志也

隼

音筍

爾雅鷹隼醜其飛也翬郭註鼓翅翬翬然疾邢疏翬翬  
其飛疾羽聲也小雅采芑云馭彼飛隼陸氏佃曰隼  
鷂屬今鷹之搏噬不能無失獨隼為有準即今之所

呼為鵲者

鵲

爾雅鵲鵲醜其飛也

變音宗

郭註竦翅上下邢疏鵲伯勞

也醜類也鵲鵲之類不能翱翔遠飛但竦翅上下而已下文烏鵲醜其掌縮疏云烏鵲之類飛時縮足於其腹下上言其翅下言其足也 召南維鵲有巢鄭

箋鵲之作巢冬至架之至春乃成疏曰月令十二月鵲始巢陸氏佃曰鵲作巢取在木杪枝不取墮地者

故一名乾鵲淮南子云鵲巢向太乙背太歲先儒以  
為鵲巢居而知風每歲多風則去喬木巢旁枝故能  
高而不危

鵲

爾雅鵲鳥醜其飛也翔邢疏鵲鵲也鳥之類其飛也布  
翅翔翔

陸氏佃曰高飛曰翔布翼不動曰翔曲禮云前有塵  
埃則載鳴鵲鵲鳴則將風故也鵲鈍者也以風作之

則高飛昔墨子作木鳶今人乘風放紙鳶 大雅旱  
麓曰鳶飛戾天李氏樗曰抱朴子云鳶飛在下無力  
及至乎天聳身直翅而上蓋鳶飛更不用力亦如魚  
躍恬然自得不知其所以然而然也

鳬

爾雅鳬鴈醜其足蹠

音卜

郭註脚指間有幕蹠屬相着其

蹠企註飛即伸其脚跟企直也邢疏鳬水鳥鴈陽鳥  
蹠相着之謂也蹠脚跟也鳬鴈之類其指間有幕飛

則伸其脚跟使直鄭風弋鳬與鴈

鵙

爾雅鵙伯勞也郭註似鵙鵙

音轄

而大左傳曰伯趙氏

邢疏伯勞一名鵙即郊子所謂伯趙氏司至者也以

夏至來冬至去故曰司至陳思王惡鳥論伯勞以五

月鳴應陰氣之動陰為殘賊蓋害之鳥也其聲鵙鵙

故以其音名

補傳曰豳風七月鳴鵙鵙仲夏始鳴至七月則鳴之

極而將去矣陸氏佃曰倉庚知分鳴鵙知至故陽氣分而倉庚鳴可蠶之候也陰氣至而鵙鳴可績之候也

### 晨風

爾雅晨風鷩郭註鷩屬詩曰馭彼晨風邢疏晨風一名鷩鷩鳥也陸璣云鷩似鷩黃色燕頷勾喙嚮風搖翮乃因風飛急疾擊鳩鵲燕雀食之

### 鳬鷺

爾雅鷗沈鳬郭註似鴨而小長尾背上有文今江東亦

呼為鷗

音施

邢疏大雅鳬鷖在涇陸璣云大小如鴨青

色卑脚短喙水鳥之謹愿者廣韻野鴨也

臣謹案毛傳云鳬水鳥也鷖鳬屬陸氏佃亦云鳬

好沒鷖好浮鷖蒼黑色鳬青色列為二種今爾雅

只說一物俟考

鶴

埤雅鶴形狀如鶩青脚素翼常夜半鳴高亮聞八九里

小雅曰鶴鳴于九臯聲聞于天禽經曰鶴愛陰而惡陽鴈愛陽而惡陰故易曰鳴鶴在陰其子和之

鸛

埤雅鸛水鳥形狀畧如鶴天將雨則長鳴而喜蓋知雨者也詩曰鸛鳴于垤婦歎于室垤蟻冢也鸛知天將雨有見于上蟻知地將雨有見于下將雨則征夫之至不必如期故婦歎于室也陸璣疏鸛長頸赤喙白身黑尾翅樹上作巢大如車輪卵如三升杯泥其巢



一傍為池含水滿之取魚置池中稍稍以食其雛若殺其子則一村致旱災

鵜

爾雅鵜鵜鵜

音鳥澤

郭註今之鵜鵜也好羣飛沈水食魚

故名洿澤俗呼之為淘河邢疏曹風維鵜在梁陸璣疏鵜水鳥形如鶴而極大喙長尺餘直而廣口中正赤頷下胡大如數升囊若小澤中有魚便羣共杼水滿其胡而棄之令水竭盡魚在陸地乃共食之故曰

淘河

詩緝曰鵜鵂當入水中食魚今乃在魚梁之上竊人之  
魚以食未嘗濡濕其翼如小人居高位竊祿不稱其  
服也

鷺

毛傳鷺禿鷺也陸氏佃曰性貪慾狀如鶴而大長頸赤  
目其毛辟水毒頭高八尺善與人鬪好啖蛇小雅有  
鷺在梁有鶴在林詩緝曰鷺鶴皆以魚為食然鷺似

鶴而貪濁實非鶴比今鶩據魚梁而飽鶴在林而飢  
喻褒姒進而申后黜王清濁無辨也

鶩 音純

說文鶩鶩鶩也陸氏佃曰鶩無常居而有常匹衛風鶩  
之奔奔補傳曰鶩所以奔奔然喜鬪者惡亂其匹而  
鬪也詩緝曰鶩奔奔然而鬪不亂其匹鶩疆疆然剛  
不淫其匹以興宣姜與頑曾鶩鶩之不如也

鶩 音團字

或作鶩

毛傳鵯鵯也小雅匪鵯匪鵯翰飛戾天李氏曰若以為  
鵯鵯之鵯無飛戾天之理孔疏鵯之大者又名鵯陸  
氏佃曰鵯能食鳥似鷹而大黑色俗呼為皂鵯其飛  
上薄雲漢

詩緝曰我非如鵯鵯能羽飛至天我非如鱸鰯能潛  
逃於淵不能高飛遠逝必不免於世患矣此解與全  
詩神氣最合陸氏佃謂人民飛揚竄伏不安如此序  
所謂亂不如嚴氏說為長

雉 翬

爾雅伊洛而南素質五彩皆備成章曰翬江淮而南青

質五彩皆備成章曰鷩

鷩與禴同音搖

邢疏周禮內司服掌

王后之六服一曰褱衣鄭註褱衣畫翬者是也一曰

褕狄鄭註褕狄畫搖是也搖與鷩音義同翬與鷩皆

雉屬陸氏佃曰大雅如翬斯飛以言其文之與散翬

鼓翅翬翬然疾也

鷩 音驕

爾雅鷓鴣雉長尾走且鳴邢疏小雅有集維鷓陸璣疏鷓  
微小于鷓走而且鳴鷓鷓然其色如雌雉尾如雉尾  
而長頭上有肉冠冠上蓂毛長數寸如雄雉尾角其  
肉甚美語云四足之美有廬兩足之美有鷓

詩緝曰言依然茂盛之平林有集止者維鷓以興王  
宮之貴宜有賢女居之也

鳥

說文烏孝鳥也象形林罕以為全象鳥形但不注其目

睛萬類目睛皆黑烏體全黑遠而不分別其睛詩莫  
赤匪狐莫黑匪烏蓋狐羣者也烏合者也故詩以况  
衛之君臣並為暴虐其惡如一管子曰烏集之交初  
雖相驩後必相咄詩人每引以刺者非特譏其為惡  
如一亦以刺其初皆利合不以道也

雞

爾雅雞大者蜀郭註今蜀雞也陸氏佃曰雞有蜀魯荆  
越諸種越雞小蜀雞大詩曰風雨淒淒雞鳴喈喈言

雞之信度如此亂世君子不改其度之譬也

桑扈

爾雅桑扈竊脂郭註俗謂之青雀嘴曲食肉好盜脂膏  
因名小雅交交桑扈率場啄粟鄭箋桑扈食肉之鳥  
今無肉而循場啄粟失其天性將不能以自活也  
詩緝曰桑扈有二種此桑扈則青雀也性之竊脂者  
也

爾雅九扈章桑扈竊脂邢疏竊即古之淺字釋獸云虎



竊毛謂之號

音棧

貓脂為白色九扈有竊玄竊藍竊黃

竊丹四種皆訓淺則此竊脂為淺白色也詩緝曰此

色之竊脂者也

陸氏佃曰桑扈蓋一名而二種釋鳥云桑扈竊脂鴉

鵲

音刁

剖葦此桑扈之一種以性言之也桑扈竊脂

棘扈竊丹此桑扈之又有一種以色言之也蓋對剖

葦言之則竊脂者所謂青質嘴曲食肉好盜脂膏者

是也對竊丹者言之則竊脂者所謂素質其翅與領

皆驚然而有文章是也左傳有九扈為九農正賈逵  
樊光皆以為棘扈為果驅鳥桑扈為蠶驅雀而或者  
非之以為就果樹入蠶室為民驅鳥雀溥天之下何  
以可周亦太泥矣蓋九扈農桑候鳥扈民無淫者也  
先王名官特取其意非必使之動作然則所謂交交  
桑扈率場啄粟者正以性之竊脂者言之故以啄粟  
為失其性交交桑扈有驚其羽者正以其色之竊脂  
者言之故其序曰君臣上下動無禮文焉蓋爾雅主

詩言之而小雅桑扈所取者有两竊脂故爾雅亦两  
解猶之無羊云九十其牯音純良耜云殺時牯牡爾雅  
有黑脣牯又有牛七尺為牯是也 補傳云或指其  
色或指其性其實一物耳

臣謹案食肉之竊脂係青質九扈之竊脂係素質  
明係二物判然難混

鄭樵曰左傳九扈皆雀屬扈一名扈爾雅云老扈鷦  
春扈頌鷦音汾夏扈竊玄秋扈竊藍冬扈竊黃桑扈

竊脂棘鴈竊丹行鴈喑喑宵鴈嘖嘖四時之鴈皆以  
時見農家須其鳴以候時故名桑鴈郭云俗謂青雀  
今名鴈背性慧可教桑棘之鴈多在是木故名

### 鴻 鴈

毛傳大曰鴻小曰鴈小雅鴻鴈于飛集于中野毛云鴻  
鴈知陰陽寒暑識所避就言民能去無道就有道幽  
風鴻飛遵渚言鴻大物宜高飛戾天今乃下循洲渚  
喻周公大聖宜在朝廷不宜久畱東都也

鷺斯

爾雅鷺斯鷺鷥郭註鷺鳥也小而多羣腹下白江東亦呼為鷺鳥邢疏詩小雅云弁彼鷺斯者語辭猶蓼彼蕭斯之類小爾雅云小而腹下白不反哺者謂之鷺鳥

詩緝曰鷺鳥不能反哺猶己之不能致養是為不孝自罪之詞也鷺鳥雖不能反哺然出食在野飽則提提然羣飛而歸是其父子相隨為可樂今我不容於

父曾鴉鳥之不如也 鳥有三種廣雅云純黑而反

哺者謂之鳥小而腹下白不反哺者謂之鴉鳥白項

而羣飛者謂之燕鳥爾雅所謂白脰鳥也

脰音豆  
項也

### 雀

邶雅雀物之淫者鼠物之貪者故詩言雀角鼠牙以譬  
強暴崔豹古今注曰九月雀入水不則多淫佚酒善  
使人淫佚故一弁曰爵爵所以戒也

### 鵠

埤雅郭璞曰鵯似鳩無後趾毛有豹文遇鷙鳥能激糞  
禦之著其毛悉脫連啼性不樹止詩曰肅肅鵯羽集  
于苞栩言鵯乃集于苞栩之上極為危苦喻君子當  
居平安之處今乃下從征役不得安其所也

桃蟲

爾雅桃蟲鵯其雌鵯

音艾

郭註鵯鵯桃雀也俗呼為巧婦

邢疏桃蟲一名鵯詩周頌云肇允彼桃蟲拚飛維鳥  
毛傳桃蟲鵯也鳥之始小終大者陸璣疏鵯鵯微小

於黃雀其雛化而為鵙故俗語鵙鵙生鵙

陸氏佃曰鵙鵙喙尖利如錐取茅莠為巢巢至精密以麻紖之如刺襪然故一名襪雀

詩緝曰我今始信小物之能成大不敢不誌也

### 梟鵂

爾雅梟鵂郭註土梟邢疏說文云梟食母不孝之鳥也故冬至捕梟磔之字從鳥首在木上詩陳風云墓門有棘有鵂萃止毛傳云惡聲之鳥一名鵂一名梟一



名鷓鴣大雅瞻卬云為鷓為鷓陸璣云鷓鴣大如班鳩綠色入人家凶賈誼所賦鷓鴣鳥是也其肉美甚可為羹臠又可為炙

鷓鴣

爾雅鷓鴣鷓鴣邢疏鷓鴣一名鷓鴣陸璣云鷓鴣似黃雀而小其喙尖如錐取茅莠為窠以麻紮之如刺襪然懸著樹枝或謂之襪雀

臣謹案陸璣疏大雅為鷓為鷓云鷓鴣大如班鳩綠

色然則鷓鴣也鷓鴣也梟鷓也土梟也鷓鴣也流  
離也實一物也爾雅載成三項未審何故襍雀陸  
佃以釋桃蟲陸璣又引以釋鷓鴣未知孰是

### 流離

爾雅鳥少美長醜為鷓鴣

音雷

郭註鷓鴣猶流離詩所

謂流離之子是也邢疏鳥之少為子者美長食母而  
醜其名為鷓鴣詩邶風云瑣兮尾兮流離之子陸璣  
疏自關而西謂梟為流離其子適長大還食其母流

與鷁同

附捕鳥具

羅

爾雅鳥罟謂之羅郭註謂羅絡之邢疏李巡云鳥飛張網以羅之詩王風云雉離于羅是也

畢

毛傳畢所以掩兔詩小雅鴛鴦于飛畢之羅之疏云網小而柄長謂之畢則執以掩物鳥罟謂之羅則張以

待鳥

罝

音衡

罟

音浮

爾雅繁謂之罝罝罟也罟謂之罟罟覆車也郭註今之翻車也有兩轆中施罟以捕鳥邢疏孫炎曰覆車網以掩兔一物五名方言異也詩王風云雉離于罟又曰雉離于罝則是捕鳥之具孫氏謂掩兔非也

臣謹案爾雅罝罟只是一物

弋

爾雅弋與杙同檝謂之弋註杙所以格獸又繳射曰弋  
詩鄭風弋鳬與鴈莊子鳥高飛以避矰弋之患列子  
弱弓纖繳乘風振之朱註弋謂以生絲繫矢而射鳥  
也

毛詩類釋卷十六

欽定四庫全書

毛詩類釋卷十七

國子監祭酒顧棟高撰

釋獸

麟

爾雅麋

音鄰

麋身牛尾一角郭註角頭有肉公羊傳曰有

麋而角邢疏李巡曰瑞應獸名孫炎曰靈獸也周南  
云麟之趾陸璣疏麟麋身牛尾馬足黃色圓蹄一角

角端有肉音中鍾呂行中規矩遊必擇地不履生蟲  
不踐生草不羣居不侶行不入陷阱不罹羅網王者  
至仁則出今并州界有麟大小如鹿非瑞麟也司馬  
相如賦射麋脚麟即此麟是注脚謂持其脚也鄭箋  
麟角之末有肉示有武而不用

騶虞

爾雅無文毛傳騶虞義獸也白虎黑文不食生物有至  
信之德則應之陸璣疏騶虞即白虎也黑文尾長於

軀不食生物不履生草君王有德則見通雅曰似虎而大見虎豹則殺之太平則至郭璞曰即騶虞山海經林氏國有此曰騶吾日行千里一曰騶牙明宣德四年滁州獻二騶虞夏原吉賦序一一與毛傳合則騶虞之為獸信矣

臣謹案騶虞一以為義獸一以為田獵之官以為義獸者起於毛傳後世如司馬相如東方朔山海經吳薛綜晉張華陸璣陸佃諸人是也以為獵官



者起於賈誼新書後世如歐陽氏嚴粲及近世何氏指是也其所以不信毛傳者以爾雅無騶虞故耳然鳥獸之名之不見於爾雅者多矣如鴛鴦鸛鶴之類皆不見爾雅豈得謂天壤間無是物耶騶虞特以世不經見遂一力排之以諸人皆附會不足信亦已過矣朱子曰看來只可解做獸名若解做騶虞之官終無甚意思平湖陸氏曰是惟瑞獸斯足歎美豈所施於賤官其言可謂簡而明矣

象

埤雅象南越大獸長鼻牙望前如後三年一乳行孕肉兼十牛令在其鼻其所食物皆以鼻取之蓋獸之象以鼻致用而不以口天之象以氣致用而不以言故天之象與獸之象同字其牙生花必因雷聲故古者以為器飾詩曰元龜象齒左傳曰象有齒以焚其身賄也

虎

爾雅彪白虎說文作彪

音覓

白虎也爾雅譌作彪

音黑叔

虎郭註漢宣帝時南郡獲白虎獻其皮骨爪牙晉永  
嘉四年建平秭歸縣檻得一獸狀如小虎而黑毛深  
者為斑山海經云幽都山多玄虎玄豹虎猛獸狀如  
貓大如牛黃質黑章鋸牙鈎爪有威骨如乙字長一  
寸在脅兩旁凡武士能扞衛者曰虎詩魯頌矯矯虎  
臣在泮獻馘

貓

爾雅虎竊毛謂之競

音棧

貓郭註竊淺也詩曰有貓有虎

邢疏虎之淺毛者別名競貓

陸氏佃曰鼠善害苗而貓能捕鼠去苗之害故貓之  
字從苗詩有貓有虎貓食田鼠虎食田鼠故詩以譽  
韓樂而記曰迎貓為其食田鼠也迎虎為其食田豕  
也云云案熊羆貓虎皆山中猛獸害人之物嚴祭曰  
四者能為人患如陸氏說則是家畜之貓爾豈可與  
三者並列乎今世山中有虎能傷人畜人呼為山貓

若真虎則不多見意當如白虎黑虎如彪羆之類耳  
若是捕鼠之貓則到處皆有何足誇美以為韓之盛  
大乎

熊

爾雅熊虎醜其子狗絕有力麇

音麇

邢疏醜類也陸璣曰

熊能攀緣上高樹見人則顛倒自投地而下冬多入  
穴而蟄始春而出正字通云熊似豕豎目人足黑色  
當心有白脂如玉謂之熊白其膽春在首夏在腹秋

在左足冬在右足好緣高木而引氣謂之熊經莊子  
所謂熊經鳥伸是也蟄時不食飢則自舐其掌掌特  
美謂之熊蹯埤雅曰詩云維熊維羆男子之祥取其  
強力壯毅故謂男子之祥也

### 羆

爾雅羆如熊黃白文郭註似熊而長頭高脚猛慙多力  
能拔樹木邢疏犬雅韓奕云赤豹黃羆陸璣疏羆有  
黃羆有赤羆大於熊其脂如熊白而粗理不如熊白

美也

豹

埤雅豹花如錢黑而小於虎文詩曰羔裘豹祛羔裘豹  
褻言大夫體柔以剛文之而已今其用暴如此非所  
以稱其服也虎豹之駒未成文已有食牛之氣及長  
退毛然後疏朗渙散蓋亦養而成之傳曰文豹隱霧  
十日不食欲以澤其衣毛成其文彩語曰豹死留皮  
豹一名程狼貪豹廉有所程度而食故其字從勺言

能勺物而取也陸璣疏毛赤而文黑謂之赤豹毛白而文黑謂之白豹

豹

爾雅豹白狐郭註一名執夷虎豹之屬邢疏大雅云獻其豹皮陸璣疏豹似虎或曰似熊一名執夷一名白狐遼東人謂之白熊

豺

爾雅豺狗足郭註脚似狗邢疏說文云豺狼屬狗聲貪



殘之獸左傳云戎狄豺狼詩小雅取彼譖人投畀豺  
虎是也

狼

爾雅狼牡羆牝狼邢疏狼牡者名羆牝者名狼陸璣疏  
其鳴能小能大善為小兒啼聲以誘人去數十步其  
猛健雖善用兵者不能免也其膏可煎和皮可為裘  
埤雅云狼大如狗青色作聲諸竅皆沸善逐獸今獵  
師遇狼則喜蓋狼之所嚮獸之所在也狼跋其胡載

囊音至其尾美周公處變而能不失其正胡狼項下袋

也老狼項下有袋求食滿腹向前行乃觸之退後又  
自踐踏上囊其尾進退有患以況周公所處之難

兕

爾雅兕似牛郭註一角青色重千斤邢疏兕如野牛青  
毛其皮堅厚可制鎧有一角角長三尺餘古人以兕  
角為觥用以為罰爵凡燕饗必用之周禮云觥其不  
敬者小雅云兕觥其觶旨酒思柔是也又吉日云發

彼小貳殪此大兕孔疏小者矢中必死小貳苦於不能射中大者射則易中惟不能即死小貳云發言發則中之大兕言殪則著矢即死言能中微而制大

猱

爾雅猱蝮

音袁

善緣邢疏猱一名蝮善攀援樹枝陸璣曰

獼猴也楚人謂之沐猴老者為猱長臂者為猿猿駿捷於獼猴其鳴噉噉而悲所謂猿啼是也

詩緝曰柳子厚憎王孫文云猿之德靜以常王孫之

德躁以囂猿即王孫也杜詩覓胡孫是也讒人爲惡  
如獼猴升木本自能之無所事教王今又信任之是  
教獼猴升木也

# 鹿

爾雅鹿牡麇

音加

牝麇其子麇

音迷

邢疏說文云解角獸也

其牝名麇埤雅云鹿分背而食食則相呼羣居則環  
其角外向以防物之害已鹿愛其類發於天性小雅  
云鹿斯之奔維足伎伎毛傳伎伎舒貌鹿見人則奔

宜速而伎伎然舒緩者顧其羣也今王兀然如傷病之木此心之所以憂也

鄭樵曰凡牛羊之屬有角無齒者則其聲呦呦駝馬之屬有齒無角者則其聲蕭蕭此亦天籟也鹿之喙似牛羊故其聲如是又得萋蒿之趣也使不識鹿則安知食草之趣與呦呦之聲乎

麋 麋

爾雅麋牡麋郭註鹿鹿麋麋鄭康成解即謂此也但重

言耳邢疏說文云麇麇也麇其總名牡名麇詩曰者  
小雅吉日篇文也鄭箋云麇復麇言多也案本草麇  
類甚多麇其總名召南野有死麇白茅包之昏禮贄  
用生鴈飾以績今取死麇非禮故序曰惡無禮也  
鄭樵曰麇父麇足其脚似麇食柏葉而臍甚香即今  
之麇香也

兔

爾雅兔子勉

芳萬切

邢疏兔舐雄毫而孕及其生子從口

而出埤雅云兔口有缺吐而生子故謂之兔兔吐也  
舊說兔明月之精視月而孕雖舐雄毫其感孕則以  
月月缺也故其口缺詩召南曰肅肅兔置椀之丁丁  
二章曰施于中逵三章曰施于中林言兔置野人當  
幽獨無人之處而于是焉肅則好德之至也文王之  
化格於芻蕘如此故序以為莫不好德賢人衆多也

豕 特 豮 豨 白 蹄 豨

爾雅豕生三子曰豮一子曰特召南詩一發五豮魏風

胡瞻爾庭有縣特是也牝曰𧢲召南一發五𧢲吉日  
詩發彼小𧢲是也四獺音滴皆白曰獺音垓小雅有豕白  
蹢蹢蹄也

右爾雅辨豕之種類其見於詩者有四曰獺曰特  
曰𧢲曰白獺豳風又有言私其獺獻豨于公毛傳  
曰豨生一歲曰獺三歲曰豨大獸公之小獸私之  
其釋獺與爾雅特異孔疏云一歲三歲蓋相傳為  
然無正文也鄭箋從爾雅豨生三子曰獺其釋豨



則無文

臣

案召南豳風及小雅皆說田獵所得之

豕非畜豕也大雅篤公劉執豕于牢牢是牧豕之處其為畜豕明矣有豕白蹢亦宜為畜豕若田獵所得之豕則宜藏匿于山野何由于道路之間知其為白蹢乎

犬

獫

歇驕

羆

盧

爾雅長喙曰獫短喙曰獨獠郭註詩秦風載獫獨獠是也今詩作歇驕又齊風盧令令毛傳曰盧田犬也戰

國策韓盧天下之駿犬也又召南詩無使尫也吠爾

雅尫狗也狗四尺為獒

許氏說文云多毛曰尫

右爾雅辨犬之種類其見於詩者凡三曰獫狁曰獬豸曰尫盧則爾雅無文臣案獫狁獬豸係田犬尫則守犬也獒見尚書旅獒

牛 犝

爾雅牛黑脣犝良耜頌曰殺時犝牡毛傳黃牛黑脣曰犝是也又牛七尺為犝小雅無羊篇誰謂爾無羊九十其犝

羊 牂 羖 羴 達 羝

爾雅羊牡牂郭註詩曰牂羊墳首孔疏牝羊小羊也首必稱身小羊而責大首無是理也牝羖邢疏白羊牝者名牂黑羊牝者名羖羖羊之性牝牡皆有角賓筵詩曰由醉之言俾出童羖責以必無之物用以為戒也未成羊名羴郭註俗呼五月羔為羴小雅既有肥羴以速諸父是也牡羊名羝生民取羝以較是也

臣謹案生民詩曰誕彌厥月先生如達鄭箋曰達

羊子也薛綜答韋昭曰羊初生名達小者名羔未成羊名羴大曰羊

右爾雅別羊之種類其見於詩者凡三曰羴曰羶曰羴羶皆牝羊也以色之白黑分羴五月羔羊也羊以小者為貴

鼠

爾雅鼯

音石

鼠郭註形大如鼠頭似兔尾有毛青黃色好

在田中食粟豆邢疏詩魏風碩鼠碩鼠無食我黍孫

炎樊光引此詩為五技之鼠許慎云能飛不能上屋  
能遊不能渡谷能緣不能窮木能走不能先人能穴  
不能覆身陸璣則曰今河東有大鼠能人立交前脚  
於頸上號舞善鳴食人禾苗人逐則走入樹空中亦  
有五技或謂之雀鼠其形大故謂之大鼠魏國今河  
北縣言其方物宜謂此鼠非鼯鼠也嚴氏粲曰經作  
碩鼠訓之為大不作鼯鼠之字其義或如陸所云

右爾雅別鼠之種類凡十三其見於詩者只鼯鼠

耳然陸璣嚴祭又謂經作碩鼠訓之為大非鼯鼠也若鼯鼠則見於春秋豹文鼯鼠則識於終軍世不多見今世所患鼠到處有之而于爾雅無文意召南穿墉之鼠即此是

狐

爾雅豺狐獬豸醜其足蹠其跡音𡗗音邢疏蹠掌也指頭

着地處名𡗗埤雅狐妖淫之物故詩每以刺惡所謂雄狐綏綏是也又曰有狐綏綏在彼淇梁言狐宜山

居今反在淇梁淇厲淇側失其常矣然失其常居猶不失其常匹衛之男女失時喪其妃耦則曾狐之不若也 獠音端豬獠也體肥行鈍穴居足尾短褐毛尖喙能孔地食蟲爾雅獠子獠郭璞獠豚也一名獠

狸

埤雅狸似羆音而小文彩斑然伏獸也其伺物卑身而伏性善擬度故大射以狸步張三侯鄭氏曰狸善搏者也行則止而擬度焉其發必獲是以量侯道取象

馬詩曰取彼狐狸為公子裘言狐善疑狸善擬不可  
以有為故古者以為燕居之裘齊大夫東郭書衣狸  
製是也

貉

埤雅貉似狸銳頭尖鼻斑色毛深厚溫滑可為裘善睡  
其營窟與獾皆為曲穴以避雨暘且以防患獾之出  
穴以貉為導詩曰一之日于貉周官所謂祭表貉即  
此于貉是也孔疏曰周禮無貉裘惟孔子狐貉之厚



以居明貉賤也詩緝曰往取貉皮以為自用之裘取  
狐狸之皮以為公子之裘賤者以自奉貴者以奉公  
也孟冬天子已裘一之日乃仲冬豫取皮乾之以為  
明年用耳考工記貉踰汶則死

貉

音喧又  
音完

爾雅貉子貉貉與貉同函史物性志貉一名貉埤雅伐  
檀一章詩曰胡瞻爾庭有縣貉兮二章曰特三章曰  
鶉貉小而特大鶉則尤小以言在位貪殘無功而受

祿其後已悉如此 獬音洵

特

爾雅豕生一子曰特又獸三歲曰特詩魏風胡瞻爾庭  
有縣特兮

附捕獸具一條

置

爾雅兔置謂之置郭註置猶遮也邢疏詩周南云肅肅  
兔置掾之丁丁李巡云兔自作徑路張置捕之也毛

傳云丁丁柝柝聲柝檠也謂擊檠於地而張置其上  
也

金仁山曰置兔而體貌有肅敬之容武夫而步武有  
約束之度許氏謙曰從金子說則此詩為賦體傳肅  
肅字置而言此肅肅主人而言

毛詩類釋卷十七

欽定四庫全書

經部

毛詩類釋卷

十八至二十一

詳校官監察御史<sub>臣</sub>莫瞻菴

刑部郎中<sub>臣</sub>許兆椿覆勘

總校官進士<sub>臣</sub>朱 鈐

校對官編修<sub>臣</sub>施培應

謄錄監生<sub>臣</sub>劉永慶

欽定四庫全書

毛詩類釋卷十八

國子監祭酒顧棟高撰

釋蟲

龜

爾雅龜俯者靈邢疏謂龜行時頭低周禮天龜曰靈屬是也爾雅有十龜一曰神龜二曰靈龜四曰寶龜書寧王遺我大寶龜是也魯頌元龜象齒毛傳曰元龜

尺二寸大戴禮甲蟲三百六十龜為之長

貝

爾雅貝居陸賦

音標貝名

在水者蝓

音含

大者鮐音抗書大傳曰

大貝如車渠車渠即鮐屬陸璣疏云貝者水中介蟲

背隆如龜腹下兩開相向類魚齒形中肉如科斗有

首尾雲南土人食之古者用其甲為貨正字通云狀

如龜鼃殼稍長背有甲十二片黑白斑文邊缺如鋸

齒無足有四鬣前後長短老者甲厚色明取時必倒

懸其身用熟醋潑之甲逐片墜下陸佃云瑇瑁不再  
交望卵影抱謂之護卵應劭曰雄曰瑇瑁雌曰觜蟪  
貝有五等漢書食貨志以為大貝壯貝么貝小貝不  
成貝為五小雅菁莪曰錫我百朋朋者謂自小貝而  
上各二貝為朋而不成貝者不為朋也又以飾器物  
魯頌貝冑朱綬謂以貝飾冑使有文采蓋古人貨貝  
而寶龜夏后以玄貝殷人以紫石周則有泉貝至秦  
廢貝行錢然五品之名尚存今貝不復為貨矣

蠶

爾雅蠶

音象

桑繭郭註食桑繭者即今蠶也周禮禁原蠶

註原蠶再蠶也蠶與馬同祖再蠶則馬受傷故禁之  
幽風蠶月條桑程子曰當蠶長之月計歲氣之早晚  
不可指定幾月

鄭樵曰原蠶傷馬今以蠶為末塗馬齒即不能食草  
以桑葉拭去乃還食此明蠶馬類也物莫能兩盛

蝨斯



爾雅蜚

音斯

螽蚣蝢

音嵩

郭註蚣蝢邢疏周南螽斯羽孔

氏正義曰此言螽斯七月云斯螽文雖顛倒其實一

也螽類長角長股股鳴者也或云似蝗而小斑黑其

股似瑇瑁又五月中以兩股相切作聲聞數十步是

也

詩緝曰螽斯蝗也螬也

音煩

即阜螽非七月所謂斯螽

也考爾雅云阜螽螬李氏陸璣許氏蔡邕之說阜螽

即蝗也螬也同是一物爾雅又云蜚螽蚣蝢此別是

一物蝗之類也螽斯即阜螽非蜚螽也毛氏誤以為此螽斯為蚣蝮孔氏因之遂以螽斯斯螽為一物非是春秋書螽即蝗也一生九十九子

阜螽

阜螽雅  
作螽

爾雅阜螽蟻郭註詩曰趯趯阜螽毛傳趯趯躍也大夫妻獨居聞草蟲嚶嚶然而鳴阜螽趯趯然躍而從之感物類之相從而思其君子

詩緝曰阜螽即螽斯也本草李時珍曰狀如蝗蟲有

異斑者江東人呼為蚱蜢謂其瘦長善跳窄而猛也  
孔疏阜螽蝗子也陸璣云兗州人謂之螽

草蟲

爾雅草螽負螻郭註詩曰啜啜草蟲謂常羊也邢疏草  
蟲一名常羊陸璣云小大長短如蝗奇音青色好在  
茅草中故名草蟲陸佃曰蓋草蟲鳴阜螽躍而從之  
故阜螽曰螻草蟲謂之負螻也

鄭樵曰螽之類多爾雅云阜螽螻草螽負螻案阜螽

蝗也草螽草蟲也亦謂蚱蜢又蚣蝑一名蚣蝑即一種大青蚱蜢股長而鳴甚響

斯螽

爾雅蜚螽蚣蝑陸氏璣曰幽州人謂之春箕蝗類也長而青長脚長股股鳴者也或謂似蝗而小斑黑其股如玳瑁五月中以兩股相切作聲聞數十步江東人

呼為吒蛸

音摘麥

詩緝曰斯螽蚣蝑也蚱蜢也舊說以為即螽斯非也

莎雞

爾雅翰

音汁

天雞郭註小蟲黑身赤頭一名莎雞邢疏詩

七月云六月莎雞振羽陸璣疏如蝗而斑色毛翅數重其翅正赤六月中飛而振羽索索作聲今絡緯蟲是也

陸氏佃曰莎雞一名絡緯謂其鳴如紡緯也促織一名投機謂其聲如急織也

蟋蟀

爾雅蟋蟀螽

音拱又音叩

郭註今促織也邢疏唐風蟋蟀在

堂歲聿其莫陸璣疏蟋蟀似蝗而小正黑有光澤如漆有角翅一名螽幽州人謂之促織秋至則鳴故俚語曰促織鳴懶婦驚是也

臣謹按朱子曰斯螽莎雞蟋蟀一物隨時變化而異其名動股始躍而以股鳴振羽能飛而以翅鳴然則斯螽乃蟋蟀之未變化者耳其非螽斯之蝗亦明矣春秋有螽為災異而三物則無歲無之豈

得為一物乎

蛸 蟥

爾雅蛸蛸郭註夏小正傳曰蛸蛸者五彩具蟥蛸郭  
註夏小正傳曰蟥蛸者蛸俗呼胡蟬詩緝曰據爾雅  
則蛸蛸與蟥蛸為二物矣故爾雅疏云首言蛸者目  
諸蟬也據詩疏引方言及陸璣之說則諸蟬皆一物  
無區別矣大雅蕩之書明云如蛸如蟥豈得以為一  
物乎毛氏於蕩之傳云蛸蟬也蟥蛸也其說是矣於

幽風四月鳴蜩傳乃云蜩蟬者蓋舉其類以相明非以蜩為蟬自為異同也

正字通曰蟬類非一統言之皆曰蟬析言之則五采具先諸蟬鳴者曰蜋蜩頭有花冠鳴聲清者曰蟬蜩曰蜋

蜩

爾雅蜚

札音

蜩蜩郭註如蟬而小有文者謂蜩衛風碩人

云蜩首蛾眉正字通曰蜩廣且方者曰蜩曰蜩蜩故



詩以比婦人之首曰螾首

蛾

正字通曰螾化者似黃蝶而小朝生暮死蟲碩人詩曰  
螾首蛾眉

蝥蟊

爾雅蝥蟊蝥郭註在木中今雖通名為蝥所在異邢疏  
蝥蟊也蝥蟊也蝥蟊也蝥蟊也桑蠹也蝥也一蟲而  
六名也以在木中者白而長故詩人以比婦人之頸

碩人云領如蝤蛸是也

伊威

爾雅伊威委黍郭註鼠婦別名又蝤音煩鼠負郭註甕器

底蟲邢疏詩東山云伊威在室陸璣云在壁根下甕  
器底土中生似白魚者是也陶註本草云多在鼠坎  
中鼠背負之是則蝤也鼠負也伊威也委黍也一物  
而四名也本草衍義曰濕生蟲也多足色如蚓背有  
橫文盛起大者長三四分磚甃及下濕處多有之長

樂劉氏曰伊威辟間小蟲也無人埽則出行於室

蠨蛸

爾雅蠨蛸長跖郭註小龍鼃

即蜘蛛

長脚者俗呼為喜子

邢疏詩東山云蠨蛸在戶陸璣云一名長脚河內人謂之喜母此蟲來著人衣當有親客至有喜也陸佃曰蠨蛸小蜘蛛而足長喜結網當戶人觸之則伸前後足如草令人不疑其為蟲

熠燿

爾雅螢火即炤郭註夜飛腹下有火邢疏詩東山云熠  
燿宵行本草螢火一名夜光一名熠燿月令季夏腐  
草為螢腐草此時得暑濕之氣故為螢至秋而天沉  
陰數雨螢火夜飛之時也

螺羸

爾雅果羸蒲盧郭註即細腰蟲也俗呼為蠚蠚邢疏詩  
小宛云螟蛉有子螺羸負之螺羸一名蒲盧即細腰  
蟲也鄭註中庸以蒲盧為土蟲說文云細腰土蟲也

天地之性小腰純雄無子

螟蛉

爾雅螟蛉桑蟲郭註俗謂之桑蠋邢疏陸璣云桑上小青蟲也似步屈其色青而細小或在草萊上螺贏取桑蟲負之於木空中七日而化為子螺贏呪之曰類我類我久則肖之是也

黃氏曰抄曰螟蛉青蟲螺贏蠚蝻古說皆謂螺贏負螟蛉之子為子置空桑中七日而化如楊子雲所謂

類我類我者嚴華谷載解頤新語曰近世詩人取螺  
贏之巢毀而視之乃自有細卵如粟寄螟蛉之身以  
畜之其螟蛉不生不死蠢然在中久則螟蛉盡枯其  
卵日益長大自為螺贏之形穴竅而出非螺贏以螟  
蛉之子為子也愚戊辰考試省闈聞同官宮教台州  
董華翁云螺贏負螟蛉埋土中而寄子其身如雞抱  
子暖之而使生然其子即螺贏之子非以螟蛉之子  
為子詩之說得之楊子雲則失之耳時有監簿永嘉

戴侗聞其說亦云常親見蠨蛸負螟蛉入筆管有兩  
蠨蛸互飛而共營之初非獨陽無子而外取螟蛉之  
子為子也如腐草化螢亦螢宿其子於腐草既成形  
則自腐草而出杜詩云幸因腐草出最精於物理

鄭樵曰凡蜂蟻皆不能生子只取他物呪成而陶隱  
居乃謂此生子如粟米大在房內仍取他蟲置其中  
以擬其子大為糧也以詩云螟蛉有子蜾蠃負之為  
謬矣後來人有壞其房而看之果見有卵如粟在死

蟲之上皆如陶所說此蓋不究其義也諸蟲在蟄尚  
不食況其形體未定猶在窠中時何得有饑飽也壞  
其房而見卵與死蟲者是變與未變耳

臣謹案黃氏日抄所云鄭夾漈已先闢去只是黃  
氏未見耳夾漈發明詩義極精但云蜂蟻皆不能  
生子只取他物呪成此則未確今蜂蟻何嘗不有

子耶

蜂蟻



爾雅蜉蝣渠畧郭註似蛄蜺身狹而長有角黃黑色叢  
生糞土中朝生暮死邢疏詩曹風云蜉蝣之羽陸璣  
疏似甲蟲有角大如指長三四寸甲下有翅能飛夏  
月陰雨時地中出樊光謂之糞中蜎蟲

鄭樵曰蜉蝣似蜺蜋而小有文彩

螟

爾雅食苗心曰螟邢疏言其姦冥冥難知也陸璣曰螟  
似好蛸而頭不赤許慎曰吏冥冥犯法即生螟

螻

爾雅食禾葉曰螻

音特

邢疏食禾葉者言假貸無厭故曰

螻也陸璣曰螻蝗也吏乞貸則生螻

蠹

爾雅食禾根曰蠹邢疏言其稅取萬民財貨故云蠹也

陸璣曰蠹螻蝥食苗根為人患許慎曰吏抵冒取民

財則生蠹

賊

爾雅食苗節曰賊邢疏食禾節者言貪狼故曰賊也陸  
璣曰賊桃李中蠹蟲赤頭身長而細耳小雅大田云  
去其螟螣及其蟊賊四種蟲皆蝗屬其害禾處不同  
故分釋之

蠋

毛傳蠋桑蟲郭璞曰大蟲如指似蠶正字通云凡草木  
上皆有之各隨所食草木之性故廣志云藿蠋香槐  
蠋臭詩蝻蝻者蠋烝在桑野偶舉桑蠋言之爾雅翼

云蠋雖蠶類然蠶萬百為族而蠋則獨行故以興獨宿者

蜂

爾雅土螽郭註今江東大螽在地中作房者名土螽木螽郭註似土螽而小在樹上作房邢疏飛蟲螫人者羅願曰螽種類至多土螽黑色最大者螫人至死周頌小毖云莫予葑蜂自求辛螫葑使也言管蔡之事無人使螽螫我乃我自求辛螫之苦耳自怨自艾之

詞也

蠅

爾雅蠅醜扇郭註好搖翅邢疏青蠅之類好搖翅自扇也小雅營營青蠅長樂劉氏曰蛆蟲所變而成者青蠅也其飛之聲則營營然亂人之聽其止於物則穢敗之又從而生蛆復變為蠅其穢敗於物無有紀極也

詩緝曰蠅能汙白為黑如讒人之誣譏善類驅去復

還如小人之易進而難退故以取喻

蛇

爾雅虺

騰音騰

蛇郭註龍類能興雲霧而遊其中蟒王蛇

郭註蟒蛇最大者故曰王蛇按小雅斯干詩維虺維蛇女子之祥朱傳曰虺蛇陰物穴處柔弱陰伏女子之祥也

虺

爾雅虺虺博三寸首大如擘郭註身廣三寸頭大如人

擘指邢疏擘拇指也頭如拇指有牙最毒細頸大頭  
色如艾綬文文間有毛似豬鬚鼻上有針大者長七  
八寸埤雅云虺狀似蛇而小銘云為虺弗摧為蛇奈  
何史記田榮曰蝮螫手則斬手螫足則斬足為其害  
於身也則虺之毒更甚

鄭樵曰江淮以南曰蝮江淮以北曰虺

蜴

爾雅蜥蜴守宮也邢疏詩小雅正月哀今之人胡為虺

蜴謂此也在草澤中者為蜥蜴在壁者名守宮博物志云以器養之食以硃砂體盡赤重七斤搗萬杵以點女人體終身不滅耦則落故號守宮陸璣疏青綠色大如指形狀可惡是也

蜮

毛傳蜮短狐孔疏洪範五行傳云蜮如鼈三足生於南越南越婦人多淫故其地多蜮淫女惑亂之氣所生也陸璣云一名射影江淮水中皆有之人在岸上影



在水中投人影則殺人故曰射影南人將入水先以  
瓦石投水中令水濁然後入或曰含沙射人皮肌其  
瘡如疥是也詩小雅為鬼為蜮則不可得言其潛伏  
人不得而見也

毛詩類釋卷十八